

**UJEDINJENE
NACIJE**



Međunarodni rezidualni mehanizam
za krivične sudove

Predmet br.: MICT-13-56-ES

Datum: 11. novembar 2025.

Original: engleski

PREDSJEDNICA MEHANIZMA

Rješava: sudija Graciela Gatti Santana, predsjednica
Sekretar: g. Abubacarr M. Tambaou
Odluka od: 11. novembar 2025.

TUŽILAC

protiv

RATKA MLADIĆA

JAVNO

**ODLUKA PO MOLBI ZA PUŠTANJE NA SLOBODU
RATKA MLADIĆA**

Zastupnici g. Ratka Mladića:

g. Dragan Ivetić
g. Branko Lukić

JA, GRACIELA GATTI SANTANA, predsjednica Međunarodnog rezidualnog mehanizma za krivične sudove (dalje u tekstu: predsjednica, odnosno Mehanizam);

PODSJEĆAJUĆI da je 8. juna 2021., Žalbeno vijeće Mehanizma potvrdilo: (i) osuđujuće presude g. Ratka Mladića (dalje u tekstu: Mladić) za genocid, progon, istrebljenje, ubistvo, deportaciju i nehumana djela (prisilno premještanje) kao zločine protiv čovječnosti i za ubistvo, terorisanje, protivpravne napade na civile i uzimanje talaca kao kršenja zakona i običaja ratovanja; i (ii) njegovu kaznu doživotnog zatvora;¹

PODSJEĆAJUĆI da je nakon pravosnažne presude Mladić ostao u Pritvorskoj jedinici Ujedinjenih nacija (dalje u tekstu: PJUN), gdje čeka određivanje države u koju će biti prebačen na izdržavanje ostatka kazne;

RJEŠAVAJUĆI po molbi koju je Mladić dostavio 5. novembra 2025., kojom traži privremeno puštanje na slobodu na period od sedam dana iz razloga saosjećajnosti kako bi mu se omogućilo da posjeti grob i prisustvuje komemoraciji za nedavno preminulog bliskog člana porodice;²

IMAJUĆI U VIDU Mladićeve argumente: (i) da se u slučajevima drugih osuđenih osoba prisustvo komemoraciji za bliskog rođaka smatralo da predstavlja uvjerljive humanitarne okolnosti za odobravanje privremenog puštanja na slobodu iz razloga saosjećajnosti i ne postoji razlog da se prema Mladiću postupa drugačije;³ (ii) da on ne predstavlja nikakvu opasnost ni po jednu žrtvu, svjedoka ni bilo koju drugu osobu i da ne postoji rizik od bijega s obzirom na njegovo fizičko stanje i prihvatanje da bude pod 24-satnim policijskim nadzorom;⁴ i (iii) da je traženi period od sedam dana potreban kako bi se, zbog njegovih medicinskih stanja i stresa izazvanog putovanjem i komemoracijom, oporavio i odmorio i kako bi mu se omogućilo da podijeli tugu s članovima svoje porodice;⁵

¹ *Tužilac protiv Ratka Mladića*, predmet br. MICT-13-56-A, Presuda, 8. juni 2021. (javno redigovano), par. 592. V. *Tužilac protiv Ratka Mladića*, predmet br. IT-09-92-T, Presuda, 22. novembar 2017. (javno s povjerljivim dodatkom) (dalje u tekstu: Prvostepena presuda), par. 5214-5215.

² Hitna molba odbrane za privremeno puštanje na slobodu iz razloga saosjećajnosti na određeni period radi prisustva komemoraciji od 40 dana, 5. novembar 2025. (povjerljivo i *ex parte*) (dalje u tekstu: Molba), par. 1, 4-5, 10, 12, 17, paginacija Sekretarijata 1728. Primjećujem da, dok Mladić traži privremeno puštanje na sedam dana, traženi period je u stvari osam dana, naime, od 1. do 8. decembra. V. Molba, par. 5, 17.

³ Molba, par. 8-9. Vidi također Molba, par. 14.

⁴ Molba, par. 13, 16. Mladić tvrdi da je tražio i očekuje da će dobiti garancije od vlasti Republike Srbije i Republike Srpske. V. Molba, par. 13-14. Ne smatram da je potrebno čekati takve garancije jer ne bi uticale na moju ocjenu Molbe.

⁵ Molba, par. 17.

IMAJUĆI U VIDU da Mladić tvrdi da, s obzirom na to da se nadležnost Žalbenog vijeća nad osuđenom osobom završava nakon donošenja pravosnažne presude, ja, u svojstvu predsjednice, moram rješavati po njegovom zahtjevu;⁶

UZIMAJUĆI U OBZIR da je prag za puštanje na slobodu privremenog karaktera iz razloga saosjećajnosti radi prisustva komemoraciji veoma visok,⁷ i da u prošlosti puštanje na slobodu u ovu svrhu pojedinaca pritvorenih u PJUN-u nije odobravano nakon što im je izrečena pravosnažna presuda;

UZIMAJUĆI U OBZIR da je Mladić osuđen na kaznu doživotnog zatvora za veoma teške zločine, da je samo mali dio njegove kazne izvršen, i da je, prije nego što je uhapšen i prebačen u Međunarodni krivični sud za bivšu Jugoslaviju (dalje u tekstu: MKSJ) u maju 2011., gotovo 16 godina izbjegavao pravdu;⁸

UZIMAJUĆI U OBZIR da je Mladiću tokom prvostepenog i drugostepenog postupka dosljedno odbijano privremeno puštanje na slobodu na osnovu zabrinutosti da se on ne bi vratio u pritvor MKSJ-a ili Mehanizma;⁹

NALAZEĆI da, u svjetlu gore navedenog, Mladić nije pokazao da je puštanje na slobodu koje traži opravdano;

IZ GORE NAVEDENIH RAZLOGA,

OVIM ODBIJAM Molbu.

Sastavljeno na engleskom i francuskom jeziku, pri čemu je mjerodavna verzija na engleskom.

Dana 11. novembra 2025.,
u Haagu,
Nizozemska.

_____/potpis na originalu/
sudija Graciela Gatti Santana
predsjednica

[pečat Mehanizma]

⁶ Molba, par. 7, gdje se upućuje na *Tužilac protiv Franka Simatovića*, predmet br. MICT-15-96-ES.1, Odluka po molbama Franka Simatovića za privremeno puštanje na slobodu i pravnu pomoć, 29. septembar 2023., str. 2. Vidi također Odluka po molbi za puštanje na slobodu Ratka Mladića, 10. maj 2024. (javno redigovano), par. 18.

⁷ Up. *Tužilac protiv Radovana Karadžića*, predmet br. MICT-13-55-A, Odluka po zahtjevima za privremeno puštanje na slobodu i za puštanje na slobodu u kraćem trajanju radi prisustva komemoraciji, 31. maj 2016., par. 7, 11.

⁸ Prvostepena presuda, par. 5222.

⁹ *Tužilac protiv Ratka Mladića*, predmet br. MICT-13-56-A, Odluka po zahtjevu za privremeno puštanje na slobodu, 19. mart 2019. (povjerljivo), str. 3-4; *Tužilac protiv Ratka Mladića*, predmet br. IT-09-92-AR65.1, Javna redigovana verzija "Odluke po interlokutornoj žalbi na odluku po hitnom zahtjevu odbrane za privremeno puštanje na slobodu" od 27. juna 2017., 30. juni 2017., par. 15, 17; *Tužilac protiv Ratka Mladića*, predmet br. IT-09-92-T, Odluka po hitnom zahtjevu odbrane za privremeno puštanje na slobodu, 12. maj 2017. (javna redigovana verzija), par. 17.